

光緒吉林通志

吉林通志卷七十一

職官志十四 宦績三

蘇清阿

樂善

祥康

經額布

倭什訥

固慶

恩華

景綸

阜保

富明阿

穆圖善

富僧阿

愛隆阿

增海

伊鋒額

常德

李金鏞

楊同桂

蘇清阿姓瓜爾佳氏隸滿洲鑲白旗嘉慶十八年從征河南教匪有功累遷二等侍衛道光六年由護軍參領授河南城守尉尋以頭等侍衛從征回逆張格爾復喀什噶爾四城及追獲張格爾以功

賜號冠勇巴圖魯授正藍旗蒙古副都統列四十功臣圖形  
紫光閣

御製贊曰河南守尉命往從軍擒拏首逆克集大勳心堅力  
勇朔漠銷氛急馳恐後嘉爾宣勤

命在乾清門侍衛上行走又

命在御前侍衛上行走十四年累授伊犁參贊大臣擢鑲藍  
旗漢軍都統

命赴回疆覆查屯田情形疏陳巴爾楚克屯田原屬荒地距  
回莊較遠與回民毫無妨礙見墾種二萬餘畝已於  
本年升科開地益多報墾愈眾不惟屯糧可供兵糈  
且於邊防大有裨益所有該處屯田應請無庸裁撤  
至喀什噶爾屯田恐久後與回田不無膠轕莫若乘  
此興辦之始早爲裁撤其無力貧民酌給口糧遣至  
巴爾楚克安置疏入

宣宗甚嘉之明年擢吉林將軍尋卒

賜祭葬諡剛愨

樂善姓博爾濟吉特氏隸滿洲正黃旗一等侯永德子嘉慶元年以一品蔭生授員外郎十年襲侯爵道光元年由頭等侍衛擢鑾白旗漢軍副都統十年累擢烏里雅蘇臺將軍調福州將軍十五年英吉利夷船乘潮駛入甌斗內洋停泊會同閩浙總督程祖洛調派文武員弁馳往查禁初猶藐抗迨官兵齊集施以槍礮始懼竄小港把總林朝江等駕舟追及該夷仍持刀相拒朝江諭令出港夷復遞稟求於閩省貿易樂善等當給印札曉以大義仍將夷船驅逐出洋

疏入

詔夷船在洋面游奕如果去而復來不服曉諭卽不能不備以兵威總在該將軍察看情形認真防範固不可邀功滋事亦不得但憑驅逐遂致廢弛當嚴飭文武水陸各員弁防守口岸杜絕接濟俾該夷不得逞其伎倆以靖海隅冬

調吉林將軍明年入

覲

命留京署鑲藍旗漢軍都統十七年授荊州將軍以目疾未之任十九年卒年七十有一

祥康隸正藍旗宗室也嘉慶十九年由宗人府七品

筆帖式署主事道光九年累遷光祿寺少卿授歸化城副都統署綏遠城將軍十五年歷遷黑龍江將軍調吉林將軍先是

盛京將軍奕經等會奏奉天圍場查禁鳥槍並沿邊防範各章程

詔吉林圍場一律查禁疏言吉林旗人素多打牲爲業除嚴禁私槍並私造外恐不肖旗人或將本身鑿字鳥槍租與雜項丁民則偷打之弊仍不能盡絕應飭各該管官查察吉林圍牆原設卡倫十四道傳遞簿雙而派差查圍官兵與坐卡弁兵並不互相呈報應遵此

次章程覈辦至嚴禁借給奸匪口米一條吉林圍場北邊係通京大路農民稠密如有偷打牲畜者本家即可密備口米雖有腰牌並無邊隘查驗惟有曉諭附近圍場旗民人等凡攜帶鳥槍斧鋸形迹可疑者不准賣給口米再奉天圍場與吉林圍場毗連之處以伊通河爲界西岸奉天設那丹保卡倫東岸係吉林伊通卡倫其間只隔一河巡查自無疏脫毋庸另議防範

允之

命查閱山西陝西營伍坐未能整飭降



盛京副都統明年署吉林將軍時以雙城堡地方有錦州等城旗丁私自耕作

命查明具奏旋疏言雙城堡京旗房地分定準數均有界址錦州等城旗丁私行來堡謀食其充丁者係頂任地丁並無占礙嗣後請每年由熊岳副都統飭諭錦州等城該管官造具細冊咨各該衙門隨時稽查分別咨覆以杜牽混

詔行之既久難保無內地民人潛往該堡影射牽混應嚴查禁止十七年卽眞二十年伯都訥副都統巴雅爾劾私令閩省官兵攤銀幫貼進京當差官兵十名歲人二百

兩

命回奏疏言前據十旗協領等稟稱吉林進京當差之員人地生疎度日拮据擬每年按名接濟銀二百兩俟二三年安居得所卽行裁撤所需銀兩於通省官兵按俸餉多寡捐資幫助恭查

聖駕巡幸

盛京吉林官兵隨營當差皆係通省官兵攤助見所挑送官兵並伊等桑梓骨肉且每人所費無幾遂咨行各副都統衙門亦皆願照辦理疏入部議坐應視

命以藍翎侍衛充庫倫辦事大臣令署將軍祿普等查明所

攤扣各兵丁餉銀於庫貯項下按名給還所墊銀兩  
令祥康追賠二十二年以足疾乞休

許之明年卒

經額布姓卜拉木氏隸滿洲正黃旗嘉慶十七年由  
伊犁撫民同知累擢至道光十六年授山東巡撫遷  
成都將軍明年調吉林將軍疏言舒蘭等處禁山有  
遊民潛入居住失察各卡站官員應交部議處如所  
請行二十三年遵

旨會議調劑雙城堡遷駐京旗章程請於該堡大封堆外所  
闢荒地六萬五千餘畝內撥出三萬畝開種徵租分

給各戶並抽撥甲兵額缺挑補

從之又疏伯都訥八里荒等處查有私墾地畝二萬八千餘  
响請以地入官徵租部議照民地銀米並徵

宣宗命與副都統薩炳阿體察奏辦明年覆疏未便照民地  
徵租仍請照旗地舊章辦理又疏涼水井地畝澆薄  
未便加租並如所議尋坐前山東巡撫任內受鹽務  
陋規降三級調用

文宗御極

詔起廢員尋

召見咸豐三年未及用卒

倭什訥姓伍彌忒氏隸蒙古正黃旗祖德楞泰繼勇  
公父蘇沖阿襲一等繼勇侯爵署黑龍江將軍道光  
九年倭什訥由一品蔭生授侍衛襲侯爵十三年累  
遷內閣學士兼禮部侍郎銜十七年以兵部右侍郎  
兼正紅旗護軍統領充

冊封朝鮮國王妃正使中間蹟而復起二十三年自左副都  
御史出署吉林副都統疏陳京旗遷駐雙城堡男婦  
不諳耕作困窮情形乞

恩調劑尋遵

旨偕將軍經額布等會議章程事具經額布傳母喪回旗二

十八年歷擢荊州將軍明年調吉林將軍咸豐二年以杭州將軍卒官

賜祭葬子希元襲侯爵光緒九年繼任吉林將軍

固慶姓額蘇里氏隸滿洲正黃旗道光八年舉人十五年由刑部員外郎

賞頭等待衛充哈密辦事大臣累遷杭州副都統三十年授吉林將軍咸豐元年疏言吉林爲根本重地近聞盜賊之盛實由窩藏之多此地旗人盡屬屯居與民雜處宵小最易溷跡已嚴飭各旗並地方官編查保甲但吉林地方遼闊密林深谷在在藏奸當日原設有

各旗界官各管各界更有巡緝捕盜之員率領兵役  
按段梭巡搜捕立法未嘗不善近如巴彥鄂佛羅邊  
門所在村莊毗連山谷多有無主尸身或有傷或無  
傷未據該界官與巡緝之員稟報則日久怠玩已有  
名無實吉林所屬人命事件舊責成地方官旗員不  
與處分故遇事輒諉諸地方並不稟報請將專設捕  
盜官悉停遇有盜賊滋擾處所不難隨時派員往捕  
且嗣後不論旗界民界一體查報再有玩延卽行參  
劾又疏雙城堡各屯旗丁可六千餘戶人數浮於前  
各處移來之人性情不一易滋事端惟一協領不足

以資彈壓擬以該堡協領改爲副都統職銜總管所  
有應辦事件徑咨報將軍衙門以專責成並將該堡  
佐領選派一員爲委協領幫辦一切事件又疏雙城  
堡所設協領佐領驍騎校各員遇有缺出以次拔補  
原爲就地取材俾諳屯務以期有益惟所轄之人皆  
童而習之不但不能彈壓且往往互相迴護擬以該  
堡協領一員佐領七員改爲公缺於吉林應選人員  
一體揀選驍騎校八員亦改爲挑選通省防禦之缺  
其協領佐領三年任滿准調補各處相當之缺又疏  
雙城堡水洄地九千餘晌與熟地毗連非禁荒可比



請分撥各佃認墾輸租充該堡官兵俸餉又疏吉林六旗馬厰地租歷年賞兵所搏節餘錢三萬八千串請以三萬串生息歲可三千餘串存將軍衙門爲捐辦修理要工經費免攤扣官兵俸餉餘八千串留爲現在修理各工之用均

從之明年疏言吉林土著旗民生齒日繁野無曠土其禁荒數處係備將來遇有酌量安置之用誠恐各邊卡日久疏懈流民復潛來將致人浮於地於旗民生計大有關礙吉林與蒙古荒界毗連難保無流民依親就食者而奸頑逃罪之徒或廁其內及乎日久小則違

刁健訟大則習爲盜賊恐吉林渾樸之鄉漸染澆漓之習應嚴飭邊卡員弁認真稽察如有潛來之戶卽行阻回其內地流民請

敕山海關副都統及奉天嚴飭各屬要隘凡有票行旅驗明放行無票者不准偷過

詔如所請尋以粵逆肆擾請率吉林官兵前赴軍營

詔吉林官兵已派大員統帶該將軍所轄亦屬緊要無庸前往軍營尋奉

命挑吉林馬隊二千派雙城堡副都統銜總管西昌阿等統領赴河南三年與副都統琦忠互訐並坐褫六年

賞藍翎侍衛充庫倫辦事大臣尋

賞二等侍衛充葉爾羌幫辦大臣平巴爾楚克土賊及英吉

沙爾回匪

賞頭等侍衛充喀什噶爾辦事大臣九年以疾乞休

允之同治九年卒

恩華隸鑲藍旗宗室鄭慎親王烏爾恭阿子道光十

三年封輔國將軍授散秩大臣咸豐三年累遷總管

內務府大臣奉

命偕兵部左侍郎趙光查辦吉林將軍固慶副都統琦忠互

訐事疏固慶於所委佐領依祿查拏私確受贓自陳

後仍回護派審此案實屬意存消弭琦忠於固慶不  
遵定制挑馬甲及揀筆帖式亦既一同盡行事經數  
月始行舉奏實屬徇隱於前攻訐於後應俱下部嚴  
議尋署吉林將軍借趙光疏言近吉林各屬匪徒執  
持火器犯案甚多經刑部申禁私硝而打牲烏拉地  
方四百餘里無業旗民藉硝土爲生擔負售賣嚮不  
之禁乾隆間有硝達硝戶名目嘉慶初年以該處採  
辦貢品差務繁多將硝達硝戶奏裁歸鋪客採買其  
阿勒楚喀三姓等城亦然嗣後若概行禁止不惟妨  
旗民生計卽官用火藥亦形支絀否則又恐匪徒恃

火器滋事不可不防應請

旨飭吉林將軍及打牲烏拉總管妥議章程或援舊案仍編  
硝達硝戶以專責成或設官商鋪戶以便考覈總期  
於官私無礙下所司議行尋回京擢理藩院尙書兼  
鑲紅旗漢軍都統幫辦河南軍務以粵逆竄入直隸  
追勦遷延逮問科爾沁郡王僧格林沁疏請留營效  
力

允之明年卒於軍

景綸姓兆佳氏隸漢軍正黃旗道光二十七年由印  
務章京累遷察哈爾副都統咸豐三年授吉林將軍

疏陳設局鑄錢及濬務事宜並宜停辦如所議行明年部議夾信溝涼水泉開荒於二年後升科以裕經費疏言生荒全恃人功物力逐歲遞加舊章五年後起租蓋豫爲之計及如式起租尙有以功力不齊難於輸納者且此次開荒先取押租錢較前已覺刻苦若復迫之起租是農事未完賦期猝至卽不半途而廢亦必困於催科惟仍俟五年後起租庶辦理不致掣肘

從之八年

命往喀爾喀查辦巴爾虎喀爾喀爭控地界其後巴爾虎復

十一  
渝約疏言巴爾虎西界接壤之區應案雍正十二年舊圖由鄂爾板西巴爾臺西北安設漠敦哈沙圖阿魯布拉克二處卡倫方符舊章如必於有泉有井之地挪移卡倫不惟事隔百數十年難以爲據而轉啟喀爾喀爭執之漸請

飭黑龍江將軍查明奏辦並繪圖貼說以進十年疏言吉林地處邊隅戶鮮股實官兵惟資俸餉黎庶惟賴耕作數年來以俄國越界各處籌辦海防所需甚鉅官民困苦實屬難支請將圍場外荒地一律開墾照夾信溝章程升科俾資供應餘則悉數解京明年倉場侍

郎成琦至興凱湖辦理中外分界事因

命察墾地徵租情形成琦疏原奏墾荒在圍場外圍場初無  
牆垣僅以卡倫封堆爲界且詢附近居民有俟新荒  
開齊將卡倫封堆向內挪移之語

詔該將軍查覆疏言圍場北面東西封堆近依民田故設堆  
時截其參差不齊以明限制又伊巴丹等七處圍場  
樹木早已無存久徒滋弊擬裁撤招墾則封堆宜徑  
直挪設因繪圖貼說以進如所議行同治元年邊外  
土匪擾莫胡屯竄越松花江至呼蘭城及阿勒楚喀  
遣兵勦平之明年朝陽礦匪於三姓黑背山糾眾起



事遣兵及鄉團練勇擊敗之分路邀截殲匪千餘其  
渠葛程龍逸去遣副都統喀通阿等由興凱湖西南  
越俄界追及於雷風河斬之夏俄酋背約強搶罪犯  
並欲入三姓城交易疏

閱

詔俄人恃強要挾得步進步是其慣技已令總理各國事務  
衙門諭其住京公使轉行固畢爾那託爾將罪犯崔福得  
送交仍止其駕船駛赴三姓惟俄人詭詐難保不陽奉陰  
違可斟酌防範如有俄船由黑河口向松花江卽所在攔  
阻毋令任意駛行逸犯崔福得可知會富呢揚阿移文催

索三年鄂摩和蘇羅據匪由山徑出竄奉天所屬圍場界  
遣兵擊潰之疏陳圍場界兩省西至奉天

興京東連羣山至鄂摩和蘇羅及甯古塔綿亙千餘里  
其中山深林密最爲逋逃淵藪盜賊一經竄入官兵  
路徑不熟步騎皆無所施見派阿勒楚喀副都統德  
英選帶兵勇設法搜捕報

聞尋疏俄官石沙木勒幅等乘輪船向松花江上駛聲稱欲  
由三姓至吉林商辦要事派員迎阻堅不允從並於  
沿途繪畫山川形勢疏入旋陳俄酋駛抵吉林欲面  
見將軍商辦要事派佐領那斯洪諭該酋與常明明

祿等會議該酋以將軍不與接見與約不符回船東去

詔吉林三姓本非通商地方俄酋違約越界其曲在彼該酋欲面見將軍雖不宜自往恐乖體制何妨傳其來見賈以違約越界折其虛憍之氣且可詢來議云何以憑辦理計不出此反令該酋得所藉口且任令繪畫山川形勢來去自由究竟因何而至仍茫然不知豈不令外國人輕視邊臣益無顧忌耶該將軍身任地方既不能阻其不來又不取傳見該酋據理斥之殊不知所辦何事未幾給事中劉毓楠以縱令協領常明等擅權納賄表裏爲奸劾罷

之光緒元年卒

阜保姓甯古塔氏隸滿洲鑲黃旗道光二十五年進士改翰林院庶吉士二十七年散館授編修同治二年累擢兵部右侍郎兼署工部右侍郎充

冊封朝鮮國王正使時吉林盜匪王五餘黨糾眾竄擾復西至大孤山旬結回匪楊發等肆掠

命署吉林將軍嚴飭所屬會同黑龍江奉天官兵合剿內閣侍讀學士于凌辰疏稱吉林開闢日廣訟獄日繁請專設理刑大員或如臺灣添設道員例加按察使銜

命察議疏言吉林地方苦瘠若設監司大員則衙署及僚屬

書差廉俸一切所需不貲日後公用仍無所出驟難  
輕議吉林與熱河俱在關外壤地相接情事頗同應  
照熱河設立刑司之例由刑部揀選正途出身漢郎  
中或員外郎一員使之主稿添設主事一員使之幫  
辦其理藩院郎中一缺本辦理蒙古事件其實蒙文  
無多擬改派刑部漢郎中一員使之掌印卽原設協  
佐領仍留一員使之幫印卽遇蒙文事件亦足辦理  
辦事衙署仍在刑司統歸將軍管轄三年期滿無過  
由將軍出具考語備文送部引

見

從之明年疏陳吉林賭風甚熾利重法輕罔知儆畏爲奸宄之藪實盜賊之源請

敕刑部分別覆讖酌量變通俾各知警下所司議行又疏盜匪之竄奉天鐵嶺開原者復由大孤山東南圍場出竄擾及吉林放牛溝該處爲兩省毗連之區此拏彼竄最易藏奸請增兵進剿得

旨迅飭所添派佐領那斯洪等覘賊所向實力兜擒五年回京光緒四年歷遷刑部尙書正紅旗蒙古都統以疾乞休

許之八年卒

賜祭葬

富明阿姓袁氏黑龍江駐防隸漢軍正白旗或曰明故督師袁崇煥裔也道光七年從征回疆有功二十五年洵任佐領咸豐二年從征河南轉戰江蘇安徽以功數被

優賚

賞戴花翎

賜號齊車博巴圖魯累擢甯古塔副都統江甯將軍和春繼

德興阿節制江北諸軍

命幫辦軍務戰六合創重

詔回旗調理食全俸同治元年起署正紅旗漢軍都統卽眞  
管理神機營事務尋

命赴揚州幫辦江甯將軍都興阿軍務明年授荊州將軍苗  
沛霖叛圍蒙城科爾沁親王僧格林沁往援

命幫辦軍務既至沛霖昏夜越濠謀竄爲王萬清斫斃剛解  
或曰初粵逆僞英王陳玉成號四眼狗者敗投沛霖  
沛霖誘而獻之降其黨是夜從二人巡濠故所降者  
也因斬沛霖首獻於萬清萬清誅二人自功其後江  
甯會城克僞忠王李秀成逸走涪化鎮乞食於老媪  
旣食伸臂脫金釧以酬媪疑之語鎮民焦贊其人獲



而勳儕輩因其姓以戲劇中焦贊名之於是從數少年循馬跡往追顛而獲焉以獻會城與蕭孚泗軍遇孚泗資焦贊以秀成自功得封爵而萬清時亦得黃馬褂云富明阿旋兼署江甯將軍三年曾國荃克江甯亦以蒙城及接辦防務功授騎都尉世職調江甯將軍兼署漕運總督以創發乞休

命食將軍全俸病愈來京五年

詔吉林需兵孔亟非簡諳練軍務大員督勦何以克靖邊氛富明阿可統兵卽赴吉林會同保山妥籌勦賊尋授吉林將軍時馬賊姜樂道由勒克山西竄而李半瘋等據

平甸子等處令營總烏里布率兵往剿半瘋竄過江東因與富爾琿等會擊於關家大橋葦子溝槐樹溝連戰皆捷獲半瘋誅之西路則自督師由八驛沿邊以進賊自黑爾蘇蛟河等處竄出令春壽率兵逆擊殪賊數百餘走奉天界令躡之而自督師入山搜剿擒斬甚眾餘益竄匿深山疏陳其概

詔認真搜捕以清餘孽山內挖金流民妥籌安置毋貽後患尋捐置烏槍二百桿備黑龍江操兵防堵及捐銀修築吉林城冬遣擊竄賊於朱克特奇河等處敗之賊走黑龍江界九年以病兼戰創復發連疏乞休

詔允之仍食將軍全俸光緒八年卒

賜祭葬如故事

穆圖善姓那哈塔氏黑龍江駐防隸滿洲鎮黃旗咸豐三年以委參領從征河南轉戰直隸山東湖北安徽諸行省所在有功而戰安徽太湖潛山挂車河及桐廬功尤最累擢協領以副都統記名

賜號西林巴圖魯

賞戴花翎同治元年荆州將軍多隆阿督辦陝西軍務隨以行以功加都統銜三年多隆阿攻盩厔卒

命署欽差大臣擢荆州將軍督辦甘肅軍務六年署陝甘總

督十三年入

覲予雲騎尉世職光緒元年吉林馬賊由松花江竄巴彥  
蘇蘇焚毀衙署東走呼蘭復誘挖金開荒等匪出山  
肆劫調署吉林將軍呼蘭賊竄黑山由三姓走甯古  
塔之樺樹林官軍先後殄之而東山金匪聚十餘萬  
烏斯渾卡倫外又聚馬賊數百謀掠阿勒楚喀尋以  
派軍堵剿無所得食其黨漸散疏言吉林風氣偷弱  
近來馬賊及徒步之棒子手橫行村落雖數百戶之  
屯市亦聞而畏避任其飽掠兵至則遠颺入山而山  
中金匪十餘萬三姓長春廳亡命博徒久住城市與

金匪暗通聲氣時欲竊發三姓甯古塔理春邊外延  
袤千百里外患交乘通籌全局非練馬步隊萬二千  
不敷守禦計通省制兵七千七百餘以二千豫備供  
差外擬挑選西丹練馬隊七千步隊五千分駐操防  
三姓甯古塔馬步隊各一千由三姓甯古塔至省城  
以阿勒楚喀爲適中總路亦撥兵扼紮餘駐省城及  
各邊隘隨時調派稽查荒佃捕拏金匪冬春圍獵訓  
練操演不數年卽成勁旅實防邊要策戶部以餉需  
無措議寢明年坐濫保永不敘用道員留吉差委罷  
尋起之五年歷調福州將軍十年法夷內犯

命大學士左宗棠爲欽差大臣穆圖善與漕運總督楊昌  
濬幫辦軍務以長門爲入閩門戶親駐防守會各國  
重修條約法夷於北洋議款不成折而南潛駛兵船  
入泊馬尾擊我兵船及船廠毀之我揚武兵船礮殪  
其酋孤拔夷船外駛扼之於長門而夷接濟兵船益  
自外至礮沈其一相持四晝夜夷亟謀外竄列其船  
於長門對峙之金牌擊毀我礮臺二守兵潰獨所部  
屹然夷登岸來戰伏兵敗之獲其剋船一礮二毀其  
舢板船二礮沈烏波船一餘船逸去明年

命爲欽差大臣會同東三省將軍辦理練兵事宜十三年

卒晉贈世職騎都尉

賜祭葬諡曰果勇

以上將軍

富僧阿姓舒穆祿氏隸滿洲正黃旗乾隆十年由藍翎侍衛累擢頭等侍衛授三姓副都統十八年罷二十三年由成都副都統再調三姓副都統明年調甯古塔副都統疏陳事宜一吉林甯古塔等處放票收錢文移所關甚要請各按地方鑄給關防一甯古塔等處官學教習須清文習熟之員嚮由官學生內挑補如一時不得其人卽於馬甲內通融選補三年期滿教課有方報部以筆帖式補用其馬甲開缺另挑

一三姓地方緝捕嚮於發遣人犯內派充此等皆不安分之徒轉恐騷擾滋事請另設番役十名並派員專管遇有失察將該員照例議處如所請行二十八年擢荊州將軍尋調黑龍江將軍三十年疏陳分遣各官往探興安山及有無俄羅斯人偷越自黑龍江至格爾畢齊河口水程千六百九十七里白河口行陸路二百四十七里至興安山其間並無人煙蹤迹又自黑龍江入精奇里江北行至託克河口水程千五百八十七里自河口行陸路二百四十里至興安山其地苦寒無水草禽獸又自黑龍江經精奇里江



入西里木第河口復過英肯河水程千三百五里自  
英肯河口行陸路百八十里至興安山地亦苦寒無  
水草禽獸又自黑龍江入鈕曼河復經西里木第河  
入烏默勒河口水程千六百十五里自河口行陸路  
四百五十六里至興安山各處俱無俄羅斯偷越我  
呼倫貝爾與俄羅斯接壤之額爾古訥河西岸係俄  
羅斯東岸俱我國地界處處設有卡座直至珠爾特  
地方今復自珠爾特至莫哩勒克河口添設二卡於  
索博爾罕添立鄂博逐日巡查俄羅斯雅瑪爾斷難  
偷越其黑龍江與俄羅斯接壤處有興安山延互至

海亦斷難乘馬偷越第自康熙二十九年與俄羅斯定界查勘各河源後從未往查嗣後請飭打牲總管每年派章京驍騎校兵丁六月由水路與捕貂人同至託克英肯兩河口及鄂勒希西里木第兩河閒徧查回報總管轉報將軍三年派副總管佐領驍騎校於冰解後由水路至河源興安山巡查一次同時呈報而黑龍江官兵每年巡查格爾畢齊河口三年亦至河源興安山巡查一次年終報部

詔允行三十三年調西安將軍四十年卒官

賜祭葬如故事

受隆阿姓覺爾察氏隸滿洲正黃旗乾隆二十年以本旗護軍參領擢齊齊哈爾副都統尋調伯都訥副都統明年授領隊大臣赴巴里坤軍所部吉林及索倫兵戰尤力

高宗御製回纥詩有是時實賴愛隆阿率千騎至皆奇勇橫衝截入亂回陳斬將獲醜如囊探二十五年凱旋授正白旗護軍統領兼鑲白旗蒙古副都統明年圖形

紫光閣

御製贊曰將門傑種拍張撫牌受將軍勳力戰全歸整師再進鼓勇陷堅弟巴靈阿盡節軀捐二十七年論平定準噶

爾回部功授一等輕車都尉世職兼一雲騎尉明年  
授伊犁參贊大臣三十年卒

增海隸正藍旗宗室也乾隆二十二年由侍衛班領  
授吉林副都統兼署伯都訥副都統二十五年疏稱  
伯都訥副都統衙門額設漢字筆帖式二員請以一  
員辦理清字事件一員改爲本處拜唐阿補放之缺  
於通曉滿洲蒙古字能翻譯者挑取專辦蒙古事件  
如所請行二十七年疏陳獲私行買賣人蔭王士學  
等八人照例治罪將人蔭及銀一併入官得

旨查出銀兩數在百兩內者不必入官分賞原擊之人如在

百兩外作爲三分二分入官一分分賞著爲例明年調甯  
古塔副都統疏請添設監獄

從之三十二年擢廣州將軍明年調福州冬調署伊犁將軍  
授理藩院尙書三十五年調黑龍江將軍疏請停止  
墨爾根驛站額設牛隻每年報倒六分之例准其三  
分報銷又疏言呼蘭運糧船隻自佐領兼管以來並  
無貽誤請將管理墨爾根戰船四品官一員裁撤於  
墨爾根協領內揀選一員並如所議行三十七年調  
盛京將軍明年卒官

詔以歷練老成屢膺統轄重寄辦事實心甚惜之贈太子太

保

賜祭葬諡勤果子德清阿官阿勒楚喀副都統

伊鏗領隸鑾藍旗宗室和碩簡親王豐訥亨子乾隆  
四十九年由鎮國將軍授二等侍衛嘉慶七年累擢  
伯都訥副都統調墨爾根城副都統十二年仍調伯  
都訥副都統明年調吉林副都統疏言甯古塔有山  
西民劉源與直隸民陳萬倉爭奪糧石被傷致死情  
節支離請將原驗之防禦倭克吉訥承審之佐領依  
成額褫職防禦德西和勒歸案質訊讞定治罪如律

十四年

命以副都統銜充葉爾羌辦事大臣尋授喀什噶爾參贊大臣明年以吉林私種葭苗該管官於解到商買餘葭多係秧葭

遣官查辦究出伊鏗額前任副都統侵用銀千餘兩坐視十八年起充伊犁領隊大臣尋

召回京二十四年充阿克蘇辦事大臣卒

常德姓索樂烏札氏黑龍江人隸滿洲正紅旗乾隆五十七年廓爾喀擾後藏從征有功嘉慶二年從征三省教匪九年以功累授佐領

賞戴花翎

賜號廡爾察巴圖魯十八年再遷總管道光三年

命以本職在乾清門行走十三年授伯都訥副都統調三姓

副都統十八年乞休

允之尋

詔食全俸以養餘年十九年卒年七十有五

以上副都統

李金鏞字秋亭江蘇無錫縣人故賈也有裨闔才用

事例及保舉累官知府需次於直隸光緒六年吉林

有意於治疏設有司官將軍銘安咨調道員以下於

直隸以碌碌無所見請行明年授檄往琿春度荒地

四十餘區招徠墾種有爭訟則平之蘇城溝者在琿



春東咸豐時以歸俄羅斯所在數千戶皆華民也以  
彼征斂苛積與迕俄威以兵金鑄召遷界內撥田與  
之民賴以全使者奉

詔來定界議謂昔年分界初未照約劃綫而罕奇毛闊崴  
等鹽場海口我所必不可讓者皆列於綫外中俄條  
約故以海中之嶺爲界嶺東屬俄嶺西屬中國宜據  
與爭使者度俄必不從則姑索黑頂子黑頂子背海  
面山去琿春六十里周以俄境中一綫達琿春不足  
索也則姑佐使者索之俄亦以非要地歸焉願俄頗  
敬服金鑄與書特署曰李知府自外姓名之而已八

年署吉林府攤丁於地民田病潦出俸溝洫之明年  
移署長春府金鑄故坦易不事威儀所至視民如家  
人與言孝弟力田操南音恐民不喻反覆不自休民  
以是益親愛之出俸倡建養正書院購書數千卷皮  
資學者且厚其廩餼又建同善堂一時有李高兩青  
天之目高謂奉天昌圖府知府高同善也壤與長春  
接而金鑄請免丈量夾荒事民尤悲思至今初長春  
故蒙古地

朝廷借居流民民墾荒者具押租錢至郭爾羅斯納蒙  
古公領地歲仍納租錢久之墾踰所領故曰夾荒於

是丈量議起民復醵錢以賄相與立永不丈量碑矣  
既又言理藩院代請丈量

朝旨如所請金鑪爭之將軍且搦碑以獻曰丈量公有  
所得某有所得他亦各有所得不丈量則皆無所得  
也將軍笑曰得幾何曰若而數又笑曰君休矣時銘  
安已罷將軍蓋希元也未幾希元去金鑪亦去十二  
年擢道員開金礦黑龍江之漠河旋卒北洋大臣李  
鴻章具其事以

問

詔贈內閣學士蔭一子知縣於原籍建祠且

命國史館立傳傳吉林循吏莫或先矣惡得以所從出少  
之劉貴者不知何許人蘇家溝民義之推爲長俄令  
短髮如其制倡言俄夷也吾儕中國民而變於夷不  
可俄怒掩誅之跳免誅其孥殆盡於是蘇家溝民遷  
於界內貴依金鏞以終論者以貴非徒義長其曹焉  
且忠於

國

楊同桂字伯馨順天通州人性警敏於學多所涉有  
當世才用國學生再應京兆試報罷援例官同知會  
東三省有練兵大臣之設奉天吉林黑龍江總統各

一大臣以年番閱必躬至穆圖善猶如制奏同桂隸  
行營歷充幫辦奉天支應局總理發審營務總辦兼  
署翼長出閱必以從於是東陲扼塞慮無不目營而  
心識之矣所治亦輒理以勞保補缺後知府用又援  
例加運同銜戴花翎爲吉林將軍長順所咨調尋奏  
留吉林歷充總理吉林邊務糧餉處發審局幫辦光  
緒十七年長順及分巡道訥欽以吉林

龍興地方志闕如議開局創修奏入

報可同桂適引

見返以充提調兼分纂志中沿革考及大事疆域所輯也

識者稱其精覈二十年長春以丈量病農事具李金  
鏞傳增稅商亦病故交闕同桂承檄署知府事際瘡  
痍之後人心皇皇日輕騎從數役走郊野躬與拊循  
歸則坐堂皇清積訟所下條教及一切官文書皆手  
治下筆立就曲中事理同桂身不踰中人貌白皙視  
之文弱書生耳機牙四應如此數月頌聲盈途次年  
代去二十二年長順舉人才與知府謝汝欽並聞於

朝

詔送部引

見未行檄署知吉林府事以疾卒始伯都訥于氏爲鄉人

所許長順以

問

遣使來讞或奏長春事不盡如長順所陳

遣齊齊哈爾副都統增祺來勘而琿春副都統恩澤幫辦  
邊務與長順時有齟齬及署將軍事多反所爲且因  
言者劾所素疾同桂旣嘗總理邊務糧餉而伯都訥  
長春二獄並周旋其間獄卒弭而亦不見疾於恩澤  
人以是報其才他所著

盛京疆域考及瀋故若而卷又南北史地理補志未成

吉林通志卷七十二

人物志一 唐 遼

李謹行

李多祚

大門藝 以上 唐

黃嗣 遼

李謹行 靺鞨人 父突地稽 新唐書 靺鞨之長也 大業中

與兄瞞咄 册府元龜 率其屬千餘內附 新唐書 處之營州 瞞

咄卒代總其眾 册府元龜 拜右光祿大夫 新唐書 遼西太守 新唐書

封扶餘侯 册府元龜 與邊人往來悅中國風俗請被冠

帶帝嘉之賜以錦綺而褒寵之及遼東之役率其徒

以從每有戰功賞賜優厚十三年從帝幸江都 隋書 屬



字文化及之亂仍歸柳城

册府元龜

在途遇李密之亂密

遣兵邀之前後十餘戰僅而得免至高陽復沒於王

須拔未幾遁歸羅藝

隋書

劉黑闥叛

新唐書

突地稽率所

部赴定州

舊唐書

上書秦王請節度以戰功封耆國公

新唐書

又徙其部落於幽州之昌平城

舊唐書

高開道以

突厥兵攻幽州突地稽邀擊敗之貞觀初進右衛將

軍賜氏李卒謹行偉容貌

新唐書

武力絕人麟德中累

遷營州都督

舊唐書

家童至數千以貲自雄夷人畏之

新唐書

累拜爲領軍大將軍爲積石道經略大使吐蕃

論欽陵等眾十萬寇湟中

新唐書

謹行兵士採樵素不

設備

舊唐書

聞虜至卽植旗伐鼓開門以伺

新唐書

吐蕃

疑有伏兵竟不敢進上元三年又破吐蕃數萬於青

海

舊唐書

璽書勞勉

新唐書

累授右衛大將軍封燕國公

永淳元年卒

舊唐書

贈幽州都督陪葬乾陵

新唐書

李多祚代爲韎鞞酋長

舊唐書

號黃頭都督後入中國

至多祚驍勇善射

新唐書

意氣感激少以軍功

舊唐書

累

遷右鷹揚大將軍討黑水韎鞞誘其渠長置酒高會

因醉斬之擊破其眾室韋及孫萬榮之叛多祚以諸

將進討以勞改

新唐書

右羽林軍大將軍前後掌禁兵

北門宿衛二十餘年神龍初張柬之將誅張易之兄

弟舊唐書以多祚素感慨可動以義乃從容謂曰新唐書

將軍在北門幾年日三十年矣舊唐書將軍擊鐘鼎食

貴重當代非大帝恩乎多祚泣數行下曰死且不忘

東之曰新唐書將軍既感大帝殊澤能有報乎舊唐書今

在東宮乃大帝之子而嬖豎擅朝危偪宗社國家廢

興在將軍新唐書將軍誠能報恩正屬今日多祚曰舊唐書

書苟援王室惟公所使嶺通志終不顧妻子性命因卽

引天地神祇爲要誓詞氣感動義形於色舊唐書東之

遂定謀以敬暉李湛爲右羽林將軍命總禁兵多祚

王同皎請太子至元武門斬關入及長生殿白武后

曰諸將誅逆臣易之昌宗恐漏大謀不敢預奏頓首  
請歸死后病卧願湛曰我於爾父子不薄亦豫是耶

中宗復位封多祚

新唐書

遼陽郡王食實封八百戶

按

通志作五百戶

仍拜其子承訓爲衛尉少卿

舊唐書

帝

祠太廟特詔多祚與相王登輿夾侍監察御史王覲  
謂多祚夷人雖有功不宜共輿帝曰朕推以心腹

卿勿復言崔元暉等得罪多祚畏禍及故陽厚韋氏

新唐書

節愍太子之殺武三思也多祚與羽林大將軍

李千里等率兵以從太子命多祚先至元武樓下

舊唐書

書

具言所以誅三思狀案兵不戰

新唐書

時有宮闈令

楊思勛於樓上侍帝

舊唐書

卽挺刀斬其墻羽林中郎

將野呼利兵因沮潰多祚爲其下所殺二子亦見害

籍沒其家

新唐書

睿宗卽位下制曰以忠報國典冊所

稱感義捐軀名節斯在故右羽林大將軍上柱國遼

陽郡王李多祚三韓貴種百戰餘雄席寵禁營迺心

王室仗茲誠信翻陷誅夷賴彼神明重清紆慝永言

徽烈深合褒崇宜追沒後之榮以復生前之命可還

舊官仍宥其妻子

舊唐書

大門藝渤海王大武藝母弟也開元十四年

本舊唐書黑

水靺鞨遣使來朝

舊唐書

帝以其地建黑水州置長史

臨總武藝召其下謀曰黑水始假道於我與唐通異

時請吐屯於突厥皆先告我新唐書今不計會卽請漢

官必是與唐家通謀腹背攻我也舊唐書乃遣弟門藝

及舅任雅相按舊唐書及文獻通考皆作任雅發兵擊黑水新唐書門

藝曾充質子至京師開元初還國舊唐書謂武藝曰黑

水請吏而我擊之是背唐也唐大國兵萬倍我與之

產怨我且亡新唐書昔高麗全盛時強兵三十餘萬舊唐書

書抗唐爲敵可謂雄強新唐書唐兵一臨掃地俱盡舊唐書

書今我眾比高麗三之一王將遜之不可武藝不從

新唐書門藝兵至境又上書固諫舊唐書武藝怒遣從兄

壹夏代將召門藝將殺之門藝懼僂路

新唐書

遂棄其

眾間道來奔

舊唐書

詔拜左驍衛將軍

新唐書

武藝上表

極言門藝罪狀請殺之

舊唐書

有詔處之安西好報曰

門藝窮來歸我誼不可殺

新唐書

今流向嶺南

舊唐書

已

投之惡死地

文獻通考

乃留其使馬文軌葱勿雅

舊唐書

不

遣別詔鳩臚少卿李道遠源復諭旨

新唐書

俄有洩其

事者武藝又上書云大國示人以信豈有欺妄之理

今聞門藝不向嶺南請依前殺卻

舊唐書

帝怒道遠復

漏言國事皆左除而陽斥門藝以報後十年

舊書作二十年

武藝遣大將張文休率海賊攻登州

新唐書

詔門藝往

幽州發兵以討之

舊唐書

使太僕卿金

按通考作全

思蘭使

新羅督兵攻其南會大寒雪袤丈士凍死過半無功

而還

新唐書

武藝懷怨不已密遣使至東都假刺客刺

門藝於天津橋南

舊唐書

門藝格之得不死河南捕刺

客悉殺之

新唐書

黃翮黃龍府人

以本紀十七延琳召黃龍府黃翮者知之

太平六年爲兵

馬都部署與副達庫濟都監霍實引軍城混同江蘇

默水之閒又引軍入女直界徇地俘獲人馬牛豕不

可勝計降戶二百七十詔獎諭之九年大延琳叛遣

使召之翮至行在告變

據本紀



